



Minggu, 30 Juni 2024

Ogen : Lukas 18:21



Kuikutken Kitik-kitikku Nari



Lit kisah sekalak anak si ndalanken kai siikatakan orangtuana. Nai lenga lit tukuren pati tualah (santan). Adi perlu santan man gulen, kurkur lebe tualah. E maka kurkuren tualah lit nge i bas rumahta sekalak-sekalak. Jabu si A lit 2 kalak anakna diberu. Anak sintua enggo mulai ietehna perkakas dapur. Tupung la rumah nandenna, lit tetanggana minjam kurkuren tualah, sabap enggo ceda baginna. Meriah kal ukur anak ndai merekensa. Pagina ka lit ka teman si deban minjam gosoken, e pe berekenna. Sekali jadi rumah nandena tupung reh kalak minjam kurkuren tualah ka, mis ajari nandena, 'katakan la lit, labo kita nikapken kurkurena.' Bagem pengajaren nande e man anakna, piah ise pe si minjam ku rumahna lanai bereken anak e. Tersuan kal pengajaren nande e man bana. Seh ia mbelin ia jadi kalak si mediker.

Mbelin kepe ngaruhna pengalamen masa danak-danak seh ku dewasa. Kai si idalankenna masa danak-danak banci saja terus terulang seh genduari. Pengakun sekalak pemimpin kalak Jahudi maka kitik-kitikna nari enggo idalankenna pedah Tuhan e me ola nangko, ola munuh, ola erlua-lua, ola nipu, ola melasken kata la tuhu dinging mehamat man nada bapa. Ertina kitik-kitikna nari enggo terbiasa ia ndalanken si mehuli. Tapi lit si kurang nina Tuhan Jesus e me ndayaken erta-erta janah bagiken man kalak musil. Seh urusen erbagi, enggo mberat ndalankensa. Akapna ban beluhna sedekah enda maka ia bayak. E maka ia pe salah sada kalak si mediker.

Perlu kal anak ibabai kitik-kitik nari jadi kalak si melumbar. Iidahna ras ialamina min e i bas diri orang tuana nari. Jadi orang tua e jadi role model man bana. Kai siidahna i bas orangtua nari biasana e tersuan i bas dirina. Termasuk pe perbahanen si mehuli, kebersihan jabu ras sekelewet rumah, metemue, ras nggit nampati. Lit min pengakun anak-anakta: enggo kulakoken si e kerina kitik-kitikku nari.

